

VENDIM
Nr. 221, datë 20.12.2019

MBI DISA NDRYSHIME NË VENDIMIN E BORDIT TË ERE-s NR. 179, DATË 8.11.2017, “MBI CERTIFIKIMIN E SHOQËRISË OPERATORI I KOMBINUAR I GAZIT NATYROR” ALBGAS SHA, TË NDRYSHUAR

Në mbështetje të nenit 16, të ligjit nr. 43/2015 “Për sektorin e energjisë elektrike”, i ndryshuar; neneve 37, 50, 59, 68, dhe 80, të ligjit nr. 102/2015, “Për sektorin e gazit natyror”, i ndryshuar, nenit 53 dhe nenit 113, pika 3, të ligjit nr. 44/2015, “Kodi i Procedurave Administrative”; neneve 6–11 të “Rregullores për certifikimin e Operatorit të Sistemit të Transmetimit të Gazit Natyror”, miratuar me vendimin e Bordit nr. 100, datë 5.8.2015, ndryshuar me vendimin e Bordit nr. 129, datë 31.10.2015; si dhe nenit 15 të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Rregullator të Energjisë (ERE), në mbledhjen e datës 20.12.2019, mbasi shqyrtoi relacionet me nr. 119/2 dhe me nr. 119/2–1 prot., datë 19.12.2019, të përgatitur nga Drejtoria e Licencimit, Autorizimeve dhe Mbikëqyrjes mbi disa ndryshime në vendimin e Bordit të ERE-s nr. 179, datë 8.11.2017, “Mbi certifikimin e shoqërisë Operatori i Kombinuar i Gazit Natyror ‘Albgaz’ sh.a.”, të ndryshuar,

konstatoi se:

- Me vendimin nr. 179, datë 8.11.2017, Bordi i ERE-s ka miratuar certifikimin e shoqërisë Operatori i Kombinuar i Gazit Natyror “Albgaz” sh.a.

- Në vijim të kësaj vendimmarrje dhe konstatimit të mosplotësimit të disa nga kushteve të vendosura në vendimin sipërcituar, Bordi i ERE-s, me vendimin nr. 63, datë 23.4.2019, ka vendosur ndër të tjera:

2. Pika 3 e vendimit nr. 179, datë 8.11.2017, të Bordit të ERE-s, ndryshon dhe bëhet:

“3. “Albgaz” sh.a. të përfundojë brenda tre muajve procedurat e aplikimit pranë institucioneve përgjegjëse për pajisjen me certifikata pronësie për të gjitha asetet që disponon.

3. Pika 4 e vendimit nr. 179, datë 8.11.2017, të Bordit të ERE-s, ndryshon dhe bëhet: “Shoqëria “Albgaz” sh.a. të dorëzojë për miratim në ERE deri në datën 31 maj 2019, Programin e përputhshmërisë të përshtatur sipas atij të miratuar nga ERE me vendimin nr. 77, datë 26.5.2017 e Bordit të ERE-s. “Mbi miratimin e programit të përputhshmërisë së Operatorit të Sistemit të Transmetimit për Gazin Natyror”.

4. Pika 5.1 e vendimit nr. 179, datë 8.11.2017, të Bordit të ERE-s, ndryshohet dhe bëhet: ““Albgaz” sh.a. të paraqesë në ERE deklaratat e audituesve financiarë dhe pasqyrat financiare të shoqërisë çdo vit ushtrimor.”

5. Afati i përcaktuar në pikën 5.2, të vendimit nr. 179, datë 8.11.2017, të Bordit të ERE-s, të shtyhet deri në datën 20.12.2019.

- Kjo shtyrje u miratua për shkak të pamundësisë së “Albgaz” sh.a. për të përmbushur të gjitha kushtet brenda afatit të përcaktuar në vendimin nr. 179, datë 8.11.2018, “Mbi certifikimin e shoqërisë Operatori i Kombinuar i Gazit Natyror ‘Albgaz’ sh.a.”.

- Me shkresën nr. 114, datë 11.11.2019, protokolluar në ERE me nr. 661/1 prot., datë 12.11.2019, shoqëria “Albgaz” sh.a. ka njoftuar ERE-n mbi plotësimin e disa prej kushteve të vendimit të sipërcituar dhe ka paraqitur kërkesë për shtyrje të plotësimit të kushteve të mbetura deri më 20.6.2020, për arsye se plotësimi i këtyre të fundit nuk varet nga vullneti i “Albgaz” sh.a.

Paraqitja e analizës për secilin kusht si më poshtë vijon:

- Në lidhje me plotësimin e pikës 3, të vendimit nr. 179, datë 8.11.2017, të ndryshuar, shoqëria “Albgaz” sh.a., nëpërmjet shkresës nr. 51 prot., datë 17.5.2019, protokolluar në ERE me nr. 266/4

prot., datë 20.5.2019, ka përcjellë dokumentacionin e kërkuar në të cilin rezulton se kushti i vendosur në pikën 3, të vendimit të Bordit të ERE-s nr. 179, datë 8.11.2017, është plotësuar tërësisht nga shoqëria “Albgaz” sh.a.

- Në lidhje me plotësimin e pikës 4, të vendimit nr. 179, datë 8.11.2017, të Bordit të ERE-s, “Albgaz” sh.a., bën me dije ERE-n se Programi i përputhshmërisë së Operatorit të Sistemit të Transmetimit për Gazin Natyror është miratuar nga Këshilli mbikëqyrës i shoqërisë, me vendimin nr. 18, datë 4.11.2019, “Mbi miratimin e programit të përputhshmërisë së Operatorit të Sistemit të Transmetimit për Gazin Natyror”, sipas seksionit VII, pika 76, e programit të përputhshmërisë. Në pikën 2 të këtij vendimi citohet se ai hyn në fuqi pas miratimit nga Asambleja e Përgjithshme. Sa më sipër cituar, kushti i vendosur në pikën 4, të vendimit nr. 179, datë 8.11.2017, të Bordit të ERE-s “Mbi miratimin e programit të përputhshmërisë së Operatorit të Sistemit të Transmetimit për Gazin Natyror”, nuk është plotësuar ende nga “Albgaz” sh.a., pasi nuk ka marrë ende miratimin e Asamblesë së Përgjithshme të shoqërisë.

- Në lidhje me plotësimin e pikës 5.1, të vendimit nr. 179, datë 8.11.2017, të Bordit të ERE-s, shoqëria “Albgaz” sh.a., ka përcjellë pasqyrat financiare të vitit 2018, së bashku me deklaratat e audituesve financiarë, të cilët janë të ndryshëm nga ata të emëruar e që kryejnë këtë veprimtari për “Albpetrol” sh.a.

Plotësimi i këtij kushti nuk çliron “Albgaz” sh.a. nga detyrimi për të raportuar në ERE çdo vit për audituesit ligjorë që kryejnë auditimin ligjor të pasqyrave financiare vjetore të vitit, në zbatim të vendimit nr. 179, datë 8.11.2017 dhe ligjit nr. 47/2016, “Për disa ndryshime dhe shtesa në ligjin nr. 10091, datë 5.3.2009, “Për auditimin ligjor, organizimin e profesionit të ekspertit kontabël të regjistruar dhe të kontabilistit të miratuar”, të ndryshuar.

- Në lidhje me plotësimin e pikës 5.2, të vendimit nr. 179, datë 8.11.2017, të Bordit të ERE-s, “Albgaz” sh.a., bën me dije se ka përcjellë pranë MIE-t kërkesën me nr. 125 prot., datë 5.11.2018, ku ndër të tjera ka kërkuar zgjidhje edhe për plotësimin e këtij kushti, por nuk ka ende asnjë përgjigje prej saj edhe pse ka kaluar shumë kohë tashmë.

ERE, me shkresën nr. 354/2 prot., datë 6.11.2019, ka kërkuar mbështetjen e MIE-s për zbatimin e parashikimeve të vendimit të certifikimit të “Albgaz” sh.a., por ende nuk ka marrë një përgjigje. Gjithashtu, ERE, me shkresën nr. 797 prot., datë 5.12.2019, ka njoftuar “Albgaz” sh.a. dhe MIE, në lidhje me zhvillim e një seance dëgjimore më 12.12.2019, ora 10:00, për të diskutuar në lidhje me masat e marra për kushtet e vendimit nr. 179, datë 8.11.2019, të cilat kanë mbetur ende pa plotësuar. Asnjë nga palët e njoftuara nuk u paraqit në këtë seancë.

- Në këto rrethana, kushti i vendosur në pikën 5.2, të vendimit nr. 179, datë 8.11.2019, pavarësisht përpjekjeve të shoqërisë “Albgaz” sh.a., por edhe ERE, mbetet ende pa plotësuar.

Për gjithë sa më sipër cituar konstatojmë:

- Referuar vendimit të Bordit nr. 179, datë 8.11.2017, nga shoqëria “Albgaz” sh.a. rezulton se nuk janë plotësuar ende kushtet si më poshtë:

- “Albgaz” sh.a. nuk ka dorëzuar për miratim në ERE deri në datën 31 maj 2019, Programin e përputhshmërisë të përshtatur sipas atij të miratuar nga ERE me vendimin nr. 77, datë 26.5.2017 e Bordit të ERE-s. “Mbi miratimin e programit të përputhshmërisë së Operatorit të Sistemit të Transmetimit për Gazin Natyror”.

- “Albgaz” sh.a. nuk ka mundur të paraqesë në ERE provat dokumentare që ndryshimet ligjore dhe nënligjore të nevojshme që lidhen me transferimin e kompetencave të Ministrisë së Infrastrukturës dhe Energjisë tek aksionari i “Albgaz” sh.a., Ministria e Ekonomisë dhe Financave, kanë ndodhur dhe janë efektive.

- Në vijim të raportimit dhe konstatimeve sa më sipër, për shkak të rrethanave, të cilat siç shpjeguar nuk varen nga vullneti i “Albgaz” sh.a. për të zbatuar parashikimet e vendimit të ERE-s

nr. 179, datë 8.11.2017, ky i fundit i është drejtuar ERE me kërkesën për shtyrjen e afatit të dërgimit të dokumentacionit të kërkuar nga vendimi nr. 179, datë 8.11.2017, deri në datën 20.6.2020.

- Në lidhje me këtë kërkesë, Kodi i Procedurave Administrative, neni 53 i tij parashikon që: afati i caktuar nga organi publik mund të zgjatet me kërkesë të justifikuar të palës së interesuar, të paraqitur përpara mbarimit të afatit.

- Kërkesa e “Albgaz” sh.a. është depozituara në ERE, me shkresën nr. 114, datë 11.11.2019, dhe duke marrë në konsideratë që afati i vendosur në vendimin e Bordit të ERE-s nr. 179, datë 8.11.2017, i ndryshuar, plotësohet në datën 20.12.2019, shqyrtimi i kësaj kërkesë përpara përfundimit të afatit, plotëson kushtet sa më sipër.

- Përveç kësaj, duke vlerësuar se për shkak të fatkeqësisë natyrore që goditi Shqipërinë, e gjithë qeveria shqiptare është e angazhuar në adresimin e problematikave që lidhen me korrigjimin e pasojave të shkaktuara nga kjo situatë dhe adresimi i çështjeve që lidhen me gjendjen e fatkeqësisë natyrore do të ketë prioritet mbi çështje të tjera, mendojmë se afati 6-mujor i propozuar nga shoqëria “Albgaz” sh.a. për shtyrjen mund të mos jetë i mjaftueshëm që MIE të finalizojë ndryshimet e kërkuara ligjore apo të miratojë në mënyrë përfundimtare në Asamblenë e Përgjithshme Programin e përputhshmërisë së “Albgaz” sh.a.

- Plotësimi i kushtit të përcaktuar në pikën 5.2, të vendimit nr. 179, datë 8.11.2017, të Bordit të ERE-s, lidhet me bërjen efektive të ndryshimeve në kuadrin ligjor, të cilat për shkak të hapave proceduralë që ndjekin deri në miratim, dhe në kushtet e konstatuara më sipër, kërkojnë një kohë më të gjatë se 6 muaj për t’u realizuar.

- Plotësimi i kushtit të përcaktuar në pikën 4, të vendimit nr. 179, datë 8.11.2017, të Bordit të ERE-s, kërkon mbledhjen e Asamblesë së Përgjithshme të shoqërisë, proces që duhet të kryhet jo vetëm në funksion të kësaj vendimmarrje, por edhe për shkak të detyrimeve ligjore që lidhen me miratimin e pasqyrave financiare të shoqërisë, të cilat në përputhje me legjislacionin në fuqi, duhet të depozitohen bilanci vjetor kontabël dhe raportin e auditimit, sipas shkronjës “a”, të nenit 43/3, të ligjit nr. 9723/2007, brenda datës 31 korrik të çdo viti.

- Për gjithë sa më sipër cituar, Bordi i ERE-s

VENDOSI:

1. Shfuqizimin e pikës 2, të vendimit të Bordit të ERE-s nr. 63, datë 23.4.2019.
2. Shtyrjen e afatit të parashikuar në pikën 3, të vendimit të Bordit të ERE-s nr. 63, datë 23.4.2019, deri në datën 20.6.2020.
3. Shtyrjen e afatit të parashikuar në pikën 4, të vendimit të Bordit të ERE-s nr. 63, datë 23.4.2019, deri më 20.12.2020.
4. “Albgaz” sh.a. të paraqesë në ERE deklaratat e audituesve financiarë dhe pasqyrat financiare të shoqërisë çdo vit ushtrimor.
5. “Albgaz” sh.a. të marrë masa brenda datës 20.6.2020, lidhur me zbatimin e ndarjes së pronësisë në përputhje me parashikimet e nenit 36, pika 2, germet “a” dhe “b”, të ligjit nr. 102/2015 “Për sektorin e gazit natyror”, i ndryshuar.
6. Nëse ndarja e pronësisë së “Albgaz” sh.a. nuk është bërë sipas nenit 36, pika 2, germet “a” dhe “b”, të ligjit nr. 102/2015 “Për sektorin e gazit natyror”, i ndryshuar, brenda datës 20.6.2020, ERE ka të drejtë të rishikojë vendimin nr. 179, datë 8.11.2017, “Për certifikimin e shoqërisë Operatori i Kombinuar i Gazit Natyror Albgaz sh.a.”.
7. Drejtoria e Licencimit Autorizimeve dhe e Mbikëqyrjes të përcjellë këtë vendim pranë “Albgaz” sh.a., Ministrisë së Infrastrukturës dhe Energjisë, Ministrisë së Financës dhe Ekonomisë, Autoritetit të Konkurrencës si dhe Sekretariatit të Komunitetit të Energjisë.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti